

# ANSANM POUR REFORM ELEKTORAL

No. 6 - 6 Oktob 2011

Opposition Newsletter for the Boycott Campaign  
of the October 1st National Assembly Elections

# LEPEP in KOZE

**L**epew Seselwa in koz byen kler dan sa swadizan eleksyon pour Lasanble Nasyonal. Seselwa in dir ki zot anvi reform elektoral deswit. Seselwa in dir dan en fason kler ki zot pa aksepte sa lesew pou 'hijack' lademokrasi par Parti Lepep ek zot lekip dalon PDM. Seselwa in tal bann kart ater byen menm e dir ki zot siport latransparans ek pli o standar dan zot pei. Wi, Seselwa in eksprim zot e tou bann lotorite dan pei i bezwen ekout byen e tou politisyen i bezwen pran dimoun serye. Se sa mesaz ki nou bezwen lir dan rezilta sa vot ki fek pase.

## Boykot i marse

Lopozisyon dan pei ti demann Seselwa swa pou reste se zot oubyen pou gat zot vot. Malgre ki SBC ti ganny lord pou pa koz lo boykot, se sa ki'n donn nou sa rezilta. Boykot in en gran sikse e son rezilta se lefe ki letan ou konpar avek eleksyon prezidansyel, plis ki 10% voter in annan sa kouraz pou reste se zot e 32% bann ki'n desann in gat zot vot. Sa i apel en vre sikse e lepep Seselwa in demontre atraver sa ki zot annan prensip e ki personn pa pou kontrol zot konmsi zot annan en bag dan zot nennen parey toro Ladig. Mesaz lopozisyon in ganny pase dan en fason tre kler e Seselwa in konpran li byen menm.

## Seselwa i konn son reprezantan

Tou dimoun ti war ki malgre ki lopozisyon pa ti pe pran par dan sa eleksyon, se nou ki ti ganny atake. Parti Lepep ek PDM, ouswa Lepep 'A' ek Lepep 'B' ti pas plis letan pe atak nou dan tou fason. Zanmen zot ti konfront kanmarad, me plito target nou. Me Seselwa in

montre zot ki sa pa marse, me ki zot konn byen lekel bann vre reprezantan ki pa pou vann zot. Nou vreman fyer nou bann siporter e sa i donn nou pli gran lankourazman ankor.

## Komans Reform Elektoral

La aprezan in ler pou komans reform elektoral ki lontan lopozisyon pe met lanfaz lo la e rezon nou ti boykot sa eleksyon. Byensir nou pou partisipe e met devan nou lide. Sa i akoz nou annan lide, nou siport lademokrasi e nou annan manda lepep Seselwa pou fer tande nou lavwa. Lopozisyon i demande ki sa travay i

komanse imedyatman akoz nou'n pare e lepep Seselwa i anvi sanmenm.

## Lavwa Lepep Seselwa i for

'Silence is golden', Angle i dir e kreol i dir 'delo trankil i profon.' Le 1 Oktob, Lepep Seselwa in montre laverite sa bann parol. San fizi, san tapaz, san lafanfar, nou'n reste se nou ouswa nou'n fer en mark lo papye vote koze. Nou lafors ek determinasyon pou ede sanz nou pei e fer demokrasi progresse. Se sa lafors lademokrasi ki kapab anmenn sanzman dan lape ek silans. Se sa ki nou siporte.

# Konte i bon - Koko ki manke

**L**vreman soka pou antann Parti Lepep ek zot dalon PDM pe konplent lafason ki syez proporsyonnel in ganny kalkile. **Pourtan se byen SPPF ki ti sanz Konstitisyon le 14 Mars 1996 pou donn Sesel en nouvo fason kalkil syez proporsyonnel. Ozordi zot plennyen akoz zot in ganny bate avek zot prop roten ki zot ti krwar zot ti pou bat UO avek dan eleksyon 1998. 'Lanmen mor in bat son met!'**

Se zis dan eleksyon 1993 ki baz pour proporsyonnel ti ganny kalkile lo 'valid votes cast'. Sa ti permet UO avek 9.71% rantr dan Lasanble. Me apre SPPF ti sanz Konstitisyon e fer ki en parti ti bezwen 10% pou rantr dan Lasanble. E dapre zot, pou fer keksoz pli difisil pour UO, zot ti osi fer baz vin pli gran e se la ki zot ti sanz 'valid votes cast' e fer li

vin 'votes cast.' Se sa ki'n vin zot roten.

Lavantaz ki lopozisyon in gannyen e ki pa'n fer gran diferans se lefe ki lakantite vot gate pa'n zanmen osi o ki sa fwa. Pran legzanmp eleksyon Lasanble 2007. Lalyans SNP/DP ti ganny 43.80% 'valid votes', savedir 23869 vot an-tou. Me letan zot ti kalkil proporsyonnel baze lo en total 55827 'votes cast', poursantaz ti desann e vin 42.75%. Me sa pa ti sanz nanryen akoz skor pa ti tonm anba 40%, alor lopozisyon ti ganny 4 syez.

Problemm dan sa eleksyon e ki pe fer sa 2 parti mantounn se sa 32% vot gate ki fer en gran diferans e alor fer zot ganny mwens syez proporsyonnel, oubyen pa ganny nanryen. Matematisyen ti'n devret remarke ki konte i bon, me koko dan son sak ki ti manke. Sepa ki trik mazisyen 'Gideri' zot pou sey fer prezan.

# 16,447 vot

# PROTESTASYON

**S**a eleksyon in montre nou klerman ki si annan diferan fason pour nou debout pour nou drwa. Nou vreman ankouraze par lafason ki Seselwa in debout pour zot drwa. Sa i montre nou ki dousman-dousman dimoun pe ganny plis kouraz e zot pa pe les nanryen vin dan zot semen koman en lobstak. Fodre nou kontinyen montre sa determinasyon.

Parti Lepep in aprann en lot leson. Dan zot kanpanya zot in esey fer dimoun per. Zot in dir ki si dimoun pa desann pou vote, zot kapab dan en kantite difikilte, tel ki dan zot

laplikasyon pou ganny en lakaz, zot biznes, en labours pour zot zanfan oubyen dan zot travay limenn.

Seselwa in servi sa menm zouti lafreyer pour zot fer tande zot lavwa e met sa menm Parti Lepep ek son partner PDM lo tapi. Sa i meyer leson ki nou kapab donner pou fer lademokrasi avanse.

I osi enportan pour dimoun aprezan realize ki letan politisyen i esey fer ou per, ou kapab koriz zot dan bwat vote. Les zot anbet ou, oubyen menas ou, me dan bwat vote, komdir kreol 'tir zot k... avek lanmen!'

Letan sa 16,447 dimoun in fini vote, zot in eksprim soulazman akoz zot in nobou ede pou ranforsi sa prosesis demokratik dan nou pei. Zot lavwa i ava ede fer Sesel vin en meyer pei ki annan bann bon lalwa e kot bann dirizan pei i ganny swazir dan en fason zis e apropiye. An dot mo, kot vre lavwa lepep Seselwa i ganny ekoute.

Lalit i kontinyen. Nou bezwen debout for kont sa ki mal e rod sa ki byen. Sa vot protestasyon i komansman. Annou bouz devan avek sa menm lespre e sa menm laforsi pou fer nou pei vin pli meyer posibil.

## Statistik Enportan dan sa Eleksyon

**N**ou prezant zot detruwa statistik enportan pour zot refleksyon. I kler ki siti-asyon politik dan pei pe sanze.

Lakantite voter lo Rezis: 69,480  
Lakantite dimoun ki ti vote: 51,592  
Lakantite bon vot: 35,145  
Lakantite vot gate: 16,447  
Vre sipor Parti Lepep dan pei: 44.7%

### Distrikt kot plis vot in gate:

Anse Etoile: 1128	Au Cap: 946
Beau Vallon: 943	Bel Ombre: 868
Anse Aux Pins: 828	Glacis: 788
Anse Boileau: 773	St. Louis: 764
Plaisance: 762	Mt. Fleuri: 762

### Sipor pli ba Parti Lepep dan distrikt:

St. Louis: 33.46%	Beau Vallon: 37.17%
Bel Ombre: 38.84%	Au Cap: 39.40%
Mt. Fleuri: 39.69	Glacis: 39.74%

La aprezan nou konpran akoz in napa okenn selebrasyon. Parti Lepep i konnen ki zot reprezant en minorite dan Lasanble menm si zot annan 31 manm. Laviktwar pour Sesel.

## MERSI ZOT TOU

Lopozisyon i remersye tou Seselwa ki ti partisip dan sa boykot eleksyon Lasanble Nasyonal. Zot in fer en gran kontribisyon dan prosesis anmenn demokrasi ek laliberte dan nou pei.

Mersi pou siport Sesel e pou azir koman bann Seselwa vreman patriotik.

Nou enform tou siporter ki sa miting ki nou ti pou fer sa Dimans in ganny anvoye. Nou pou enform zot semenn prosenn kan nou pou fer miting piblik.

Mersi pour zot konprenezon.

## Laverite finalman i ganny devwale

**T**ou dimoun ti soke pou lir papye Parti Lepep, 'People Plus' ki ti sorti Lendi le 3 Oktob. Dan sa papye, laverite ki nou tya pe dir zot tou sa letan konsernan relasyon ant Parti Lepep ek PDM ti ganny devwale. I kler ki zot tya pe travay ansanm e ki zot lentansyon sete ki Lepep 'A' tya kontan ki Lepep 'B' i debout akote zot koman en lopozisyon fantonn. Sa rezilta in definitivman kas zot plan.

Premyerman Parti Lepep pe lager pour PDM ganny en 'seat' dan Lasanble. Zot oublie ki sete zot menm ki ti fer lamannman Konstitisyon pou sanz sa. Sete Mr. Danny Faure, koman Leader of Government Business ki ti propoz lamannman e Mrs. Marie-Louise Potter ki ti segonde e zot tou zot ti vot an-faver.

Dan zot papye, Parti Lepep i menm remersye PDM pour zot partisipasyon dan eleksyon!

Depi kan eski sa i arive? Akoz zanmen zot in remersye lopozisyon avan? Sa i tre senp: Zot in anvi remersye PDM akoz se PDM ki n permet zot annan en eleksyon, menm si i ti zis en fars.

Seselwa, annou reste alert. I annan tou kalite zes ki pase dan sa pei. Annou pa les sa bann trik fer nou perdi nou lobzektiv. Reste alert e ansanm nou ava anmenn sa vre sanzman dan nou pei e fer laplenn nivo partou kote.

## MERSI pour OU SIPOR dan BOYKOT